

---

## PWYLLGOR PENSIYNAU 26-02-2026

---

|                     |                                                                                                                                                                                                                                                                           |
|---------------------|---------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>Presenoldeb:</b> | Cynghorydd Elin Hywel (Cadeirydd)<br>Cynghorydd John Pughe Roberts (Is gadeirydd)                                                                                                                                                                                         |
| <b>Cynghorwyr:</b>  | Stephen Churchman, Geraint Parry, ac Ioan Thomas                                                                                                                                                                                                                          |
| <b>Swyddogion:</b>  | Dewi Morgan (Pennaeth Cyllid), Ffion Madog Evans (Pennaeth Cyllid Cynorthwyol - Cyfrifeg a Phensiynau), Delyth Jones-Thomas (Rheolwr Buddsoddi), Iwan Evans (Pennaeth Gwasanaethau Cyfreithiol – Swyddog Monitro), a Lowri Haf Evans (Swyddog Gwasanaethau Democratiaeth) |

### Eraill a wahoddwyd:

Tony Deakin (aelod o'r Bwrdd Pensiwn) - arsylwi

#### 1. YMDDIHEURIADAU

Derbyniwyd ymddiheuriadau gan John Brynmor Hughes, a Robin Williams (Cyngor Sir Ynys Môn)

Yn dilyn penderfyniad y Cyng. R Medwyn Hughes i sefyll i lawr fel Aelod, a Chyn-gadeirydd o'r Pwyllgor Pensiynau, diolchwyd iddo am ei waith a'i gefnogaeth i'r Pwyllgor dros ei gyfnod fel Aelod.

#### 2. DATGAN BUDDIANT PERSONOL

Dim i'w nodi

#### 3. MATERION BRYD

Dim i'w nodi

#### 4. PARTNERIAETH PENSIWN CYMRU (PPC) - DIWEDDARU'R CYTUNDEB RHYNG - AWDURDOD (IAA)

Cyflwynwyd adroddiad gan y Pennaeth Cyllid a'r Rheolwr Buddsoddi yn amlygu'r angen i'r Pwyllgor argymhell yn ffurfiol i'r Cyngor Llawn gymeradwyo'r Cytundeb Rhyng-Awdurdod (IAA).

Atgoffwyd yr Aelodau mai fframwaith cyfreithiol a llywodraethu ffurfiol sydd yn rhwymo wyth awdurdod gweinyddu Cynllun Pensiwn Llywodraeth Leol Cymru i Bartneriaeth Pensiwn Cymru yw'r Cytundeb Rhyng-Awdurdod. Adroddwyd bod y Cytundeb Rhyng-Awdurdod (IAA) wedi ei gymeradwyo yn gyntaf yn 2017 pan sefydlwyd PPC, ond yn dilyn ymgynghoriad 'Addas i'r Dyfodol', a'r addasiadau oedd eu hangen i sicrhau cydymffurfiaeth â gofynion Llywodraeth y DU, sefydlwyd ac ymgorfforwyd cwmni rheoli buddsoddiadau 'WPP IM Co. O ganlyniad, ystyriwyd ei bod yn angenrheidiol cynnal adolygiad cynhwysfawr o'r IAA i sicrhau ei fod yn parhau i fod yn briodol. Ategwyd, er bod PPC wedi bod yn llwyddiannus gyda llywodraethiant a threfniadau da yn arwain at ddychweliadau da, nid oedd Llywodraeth y Deyrnas Unedig yn fodlon parhau â'r trefniant ac felly bu rhaid ffurfio cwmni buddsoddi newydd; o dan ofynion 'Addas i'r Dyfodol' bydd addasiadau sylweddol i'r strwythur presennol, fydd angen bod yn weithredol erbyn y 1af o Ebrill 2026.

Cyfeiriwyd at brif newidiadau'r strwythur newydd ynghyd a'r nodyn sicrwydd roedd Hymans Robertson (ymgyngorydd goruchwyllo a llywodraethu PPC) wedi ei baratoi i'r wyth awdurdod gweinyddol. Nodwyd bod y nodyn sicrwydd, yn cynnwys mewnbwn gan yr wyth awdurdod, ac yn rhoi trosolwg annibynnol ar y drefn newydd a'r diwygiadau allweddol arfaethedig oedd yn rhan o'r argymhelliad.

Tynnwyd sylw at waith a baratowyd gan Burges Salmon (cyngorydd cyfreithiol PPC) oedd yn manylu at holl ddiwygiadau arfaethedig i'r IAA. Rhoddwyd sicrwydd i'r Pwyllgor bod sawl haen o oruchwyliaeth wedi craffu'r cytundeb arfaethedig oedd yn cynnwys trafodaethau gyda'r Grŵp Llywio, a Swyddogion Monitro'r wyth awdurdod gweinyddol wedi rhoi mewnbwn i sicrhau bod y Cyngorau unigol yn ddiogel; Bydd pob un o'r wyth awdurdod gweinyddol yn dilyn yr un drefn i gymeradwyo'r Cytundeb Rhyng-Awdurdod.

Diolchwyd am yr adroddiad.

Diolchwyd am y gwaith cefndirol oedd wedi ei wneud i baratoi'r cytundeb o fewn amserlen dynn, ac i Hymans Robertson a Burges Salmon ar eu gwaith craffu da o amlygu'r goblygiadau.

Diolchwyd am y gweithdy rhannu gwybodaeth a drefnwyd ar gyfer aelodau'r Pwyllgor Pensiynau a'r Bwrdd Pensiwn (23-02-26) y drafodaeth wedi bod yn werthfawr a buddiol ac wedi ei gynnal o fewn awyrgylch hynaws – yn rhoi sicrwydd bod y Pwyllgor yn gwneud penderfyniadau cywir.

Sylwadau yn codi o'r drafodaeth ddilynol:

- Pryder bod rôl y Pwyllgor yn ymddangos fel corff goruchwyllo ac yn colli'r hawl o fod yn rhan o drafodaeth buddsoddiadau
- Pryder bod y Pwyllgor yn colli'r rôl reolaethol a'u cyfrifoldebau
- Pam mai Uwch Swyddog ac nid Aelod sydd ar y Fforwm Cyfranddalwyr? Cyfle yn cael ei golli o gael llais Aelodau ar y Fforwm - bydd y cyhoedd yn cysylltu / rhannu eu pryderon gydag Aelodau Etholedig os na fydd pethau yn mynd yn dda, felly doeth fyddai iddynt gael mewnbwn
- Rhaid pwysleisio mai ymateb i ofnion statudol yw cymeradwyo'r Cytundeb Rhyng-Awdurdod
- Bod ansawdd y gwaith cefndirol o safon uchel iawn, yn broffesiynol a manwl - y Pwyllgor yn ddibynnol ar safon gwybodaeth o'r lefel yma

Mewn ymateb i'r sylwadau, derbyniodd y Pennaeth Cyllid bod y sefyllfa yn un rhwystredig a bod haenau o gymhlethdod yn cael eu hychwanegu at y drefn bresennol sydd, hyd yma, wedi bod yn glir a threfnus iawn. Ategodd mai ef fel Swyddog Adran 151 fydd yn mynychu'r Fforwm Cyfranddalwyr ar ran y Cyngor (ac nid PPC) lle bydd dyletswydd ganddo i sicrhau bod cyfranddaliadau a gweithredoedd yn ddiogel. Ategodd y Swyddog Monitro mai Cyfranddaliwr yw'r Cyngor yn y sefyllfa yma sydd â hawl i bleidlais ar y penderfyniadau i warchod buddiannau Gwynedd; byddai modd trafod hynny yn yr eitem cymeradwyo Cytundeb Cyfranddalwyr.

Cynigiwyd ac eiliwyd cymeradwyo'r Cytundeb i'r Cyngor Llawn

#### **PENDERFYNWYD:**

- **Nodi cynnwys yr adroddiad a'r atodiadau.**
- **Argymhell y Cytundeb Rhyng-Awdurdod (IAA) ddiwygiedig i'r Cyngor Llawn ar 5 Mawrth 2026 am gymeradwyaeth fel mater wedi ei neilltuo**

## **5. CAU ALLAN Y WASG A'R CYHOEDD**

**PENDERFYNWYD** cau'r wasg a'r cyhoedd allan o'r cyfarfod yn ystod y drafodaeth ar yr eitemau canlynol gan ei fod yn debygol y datgelir gwybodaeth eithriedig fel y'i diffinnir ym Mharagraff 14 o Atodiad 12A o Ddeddf Llywodraeth Leol 1972 Gwybodaeth ynglŷn â thrafodion ariannol neu fusnes unrhyw berson penodol (yn cynnwys yr awdurdod sydd yn dal y wybodaeth hynny).

Mae budd cyhoeddus cydnabyddedig mewn bod yn agored ynglŷn â defnydd adnoddau cyhoeddus a materion ariannol cysylltiedig. Cydnabyddir fodd bynnag fod adegau, er gwarchod buddiannau ariannol cyhoeddus fod angen trafod gwybodaeth fasnachol heb ei gyhoeddi. Mae'r adroddiadau yn benodol ynglŷn â phroses gaffael arfaethedig. Byddai cyhoeddi gwybodaeth fasnachol sensitif o'r math yma yn gallu bod yn niweidiol i fuddiannau'r Cyngor a'i bartneriaid drwy danseilio cystadleuaeth. Byddai hyn yn groes i'r budd cyhoeddus ehangach o sicrhau'r allbwn cyfansawdd gorau. Am y rhesymau hyn mae'r materion yn gaedig er y budd cyhoeddus.

## **6. PARTNERIAETH PENSIWN CYMRU (PPC) – DOGFENNAU LLYWODRAETHU I FODLONI'R GOFYNION "ADDAS AR GYFER Y DYFODOL"**

Cyflwynwyd adroddiad gan y Pennaeth Cyllid a'r Rheolwr Buddsoddi mewn ymateb i fodloni uchelgeisiau "Addas ar gyfer y Dyfodol" Llywodraeth y Deyrnas Unedig (bydd disgwyl iddynt ddod yn Ddeddfwriaeth ar 31 Mawrth 2026), drwy wneud newidiadau angenrheidiol i drefniadau llywodraethu presennol Partneriaeth Pensiwn Cymru (PPC) tra hefyd yn cyflwyno dogfennau annibynnol newydd - Cytundeb Cyfranddalwyr (SHA) a Cytundeb Gwasanaethau Cleientiaid (CSA).

Eglurwyd, yn wahanol i'r Cytundeb Rhyng-Awdurdod, bod y Cyngor Llawn (Gorffennaf 2025) wedi dirprwyo'r hawl i'r Pwyllgor Pensiynau gymeradwyo dogfennaeth ffurfiol derfynol ar gyfer gweithredu'r Cwmni Rheoli Buddsoddi a rhoi hawl i Swyddog Adran 151 mewn ymgynghoriad â Chadeirydd y Pwyllgor Pensiynau i fwrw ymlaen gyda Phrosiect yr Wyddfa gydag Awdurdodau Gweinyddu PPC yn unol ag amserlen y Llywodraeth o fewn y gyllideb gymeradwy.

Trafodwyd Cytundeb Cyfranddalwyr (SHA) a'r Cytundeb Gwasanaethau Cleientiaid (CSA).

### **PENDERFYNWYD**

- 1. Cymeradwyo'r Cytundeb Cyfranddalwyr (SHA) sydd newydd ei greu, sy'n ofyn cyfreithiol.**
- 2. Cymeradwyo'r Cytundeb Gwasanaeth Cleientiaid (CSA) sydd newydd ei greu, sy'n ofyn cyfreithiol.**
- 3. Lle bo hynny'n briodol, i ddirprwyo pwerau i'r Pennaeth Cyllid, mewn ymgynghoriad â Chadeirydd y Pwyllgor Pensiynau, i wneud mân ddiwygiadau i'r cytundebau, ar yr amod na fydd yn newid sylwedd y cytundebau**
- 4. Ymhen 12 - 18 mis, dylid adolygu'r Cytundeb Cyfranddalwyr (SHA) i archwilio sut i gynnwys cynrychiolwyr etholedig mewn swyddogaeth ddibleidlais.**
- 5. Fel rhan o raglen waith y Pwyllgor, bod angen edrych ar wella trefniadau craffu a herio adroddiadau PPC IM Co**

6. **Bod angen cynnwys cymal yn rhaglen waith y Pwyllgor i roi ystyriaeth i gyfleoedd buddsoddi yn lleol / a neu ystyriaeth i gynigion o fuddsoddi yn lleol**

Dechreuodd y cyfarfod am 10:30 a daeth i ben 11:40